

HazteOir denuncia a marcha gay de Madrid ante o fiscal xeral

# A ameaza do 'lobby' católico

**Din que insultaron ós Kaczynski, que se incitou ó odio e que se defendeu a materia de Cidadanía**

Europa Press - Madrid

HazteOir.org (fío), unha das asociacións radicais que máis se enfrontou ao Goberno socialista, denunciou a marcha do Orgullo Gay 2007, celebrada en Madrid o pasado 30 de xuño. HazteOir.org quere que o fiscal abra un procedemento penal contra os seus organizadores por un posible delito de "ofensa ós sentimentos relixiosos" ante o que eles consideran unha incitación ó "odio, a intolerancia e a exclusión" por parte dos homosexuais.

A celebración, subliña a asociación nun comunicado, constitúe "o elenco máis completo de burlas, ofensas e ameazas contra os que non aceptan os dogmas do lobby máis poderoso".

Igualmente, lamentan as críticas por parte do colectivo contra aquelas persoas que "desde o campo da Sanidade ou da Ciencia e non movidos por crezas relixio-

sas, discrepan das súas máximas que salientan as bondades da promiscuidade sexual ou que se defenden o dereito dos pais a educaren os seus fillos no terreo da afectividade segundo as súas propias convicións". Neste sentido, asegura que non é casualidade que a marcha fixese bandeira da materia de Educación para a Cidadanía.

A organización pide a destitución do concelleiro Miguel Ángel Villanueva, do Concello de Madrid, por outorgarlle financiamento público a "un espectáculo tan ferinte para miles de cidadáns madrileños". De feito, arremeten por dárilles ós colectivos "100.000 euros, o dobre que en edicións anteriores e procedentes de todos os cidadáns, incluídos pois os ofendidos, o Odio Gai 2007", advirte. Como exemplo, cita que participantes do acto calumniaron a bispos e curas, á vez que tacharon de "homófobos" ós que tratan de evitar os matrimonios entre persoas do mesmo sexo.

HazteOir.org critica tamén o pregón do do Orgullo Gai, difundido o venres 29 de xuño, porque na súa opinión "serviu para blasfemar e calumniar con fruición". A modo de exemplo, citan unha parte del: "Queremos que o oso ou a



Carla Antonelli, unha histórica do movemento transexual

## TRANSEXUAL ■■■■■ Antonelli deixa a política

A histórica activista transexual Carla Antonelli anunciou a súa saída do Grupo Federal de Gais, Lesbianas, Transexuais e Bisexuais do PSOE "por motivos de traballo". Antonelli agradécelles "a todas as persoas do PSOE o trato recibido", especialmente a Zerolo e a Zapatero.

osa de Madrid abraza a Ratzinger, os xemelgos Kaczynski e devore: os homófobos". HazteOir.org é unha asociación civil que asegura defender a familia, a dignidade da persoa e o valor da vida, desde unha concepción cristiá do home e da sociedade, á vez que asume como misión promover a participación dos cidadáns na política. Na súa páxina web, son maioría as informacións contra o movemento gay, contra o Goberno socialista, contra a educación laica ou contra os nacionalismos, agás o español. ●

## EXPEDICIÓN

Din que xa se facía na antigüidade

## Un grupo de aventureiros cruzará o Atlántico nunha balsa de xuncos

Un grupo de aventureiros intentará demostrar que o comercio a través do Atlántico era xa posible hai 14.000 anos, mediante unha expedición na que cruzarán ese océano cunha balsa de xuncos de deseño prehistórico.

Esta ambiciosa expedición oceánica busca corroborar que os navegantes da antigüidade tiñan os suficientes coñecementos náuticos como para superaren a difícil ruta do Atlántico Norte, desde o Novo Mundo ó Mediterráneo.

A balsa *Abora III*, nome que alude ó deus Sol dos antigos Guanches canarios, é unha réplica dos navios de xuncos da Idade de Pedra, e construírona entre 2005 e 2006 indios aimará en Bolivia, con tecnoloxía étnica tradicional.

O seu deseño refinouse en Nova York entre maio e xuño deste ano mediante a instalación de quillás laterais que lle permitirán navegar de través e recibir o vento polo costado.

"Con este deseño logramos o noso obxectivo", sinalou José Valmaña, un dos dous tripulantes hispanos do navio, xunto ó boliviano Fermín Linachi, indio aimará que dirixiu a construción da embarcación.

O equipo de exploradores, encabezado polo alemán Dominique Gurlitz, partirá o 11 de xullo rumbo a España desde un peirao do río Hudson, en Nova York. ● A. VILLASMI (EFE)

**MEDIO NATURAL ■** Un estudo canadense amosa a desaparición de humidais ó norte do país

## O quecemento global seca as lagoas árticas

As lagoas das latitudes elevadas do Ártico, o recurso de auga superficial máis común en moitas rexións polares, están comezando a evaporarse debido ó quecemento climático máis recente, segundo un estudo da Universidades de Queen e Alberta en Canadá.


Os científicos, dirixidos por John Smol e Marianne Douglas, foron tomando de forma regular desde o ano 1983 mostras da calidade da auga e do conxunto de especies de 40 lagoas en Cabo Herschel, na área canadense do Ártico nas súas latitudes elevadas. Os ecosistemas

polares como este son moi sensibles ós efectos do clima e a outros cambios ambientais, o que os converte nunha especie de sistema de alarma como o foron no seu momento os canarios nas minas.

Na década dos 90 os investigadores comezaron a recoñecer unha tendencia na diminución dos niveis da auga e cambios na súa composición química. Cando volveron en xuño de 2006, o ano máis cálido segundo os rexistros desa área, algunhas das lagoas da rexión secaran e os niveis de auga dalgunhas outras reducíranse de forma destacada.

Segundo os investigadores, a causa da evaporación destas lagoas do Alto Ártico é o ascenso das temperaturas. Ó medir os cambios na calidade da auga durante máis de 24 anos, os científicos poden amosar como a concentración de saies foi aumentando de forma crecente. Isto suxire que os niveis de auga están descendendo e que a auga restante está máis concentrada debido á evaporación por causa do quecemento.

Outro descubrimento é a desecación de humidais de rexións veciñas. "As consecuencias ecolóxicas de cambios nos humidais como estes son alarmantes", apuntan Smol e Douglas. Para eles, as lagoas constitúen "puntos quentes" da biodiversidade así como o hábitat de moitas aves, insectos e outros organismos. As alteracións ecolóxicas producidas provocarán probablemente unha fervenza de cambios en todo o ecosistema. ● EUROPA PRESS



Imaxe dos efectos do desxeo no Ártico